



Umhverfis- og samgöngunefnd
nefndarsvið@althingi.is

Reykjavík, 29. janúar 2024
Tilvísun: 2307078 JÞ

Umsögn um frumvarp um breytingar á lögum um tekjustofna sveitarfélaga nr. 4/1995 m.s.br. (fasteignaskattur í Grindavíkurbæ), 617. mál

Grindavíkurbær vísar til erindis frá nefndasviði Alþingis, dags. 25. janúar sl. þar sem óskað er eftir umsögn sveitarfélagsins um ofangreint frumvarp.

Frumvarpið er liður í því að bregðast við þeirri stöðu sem uppi er í Grindavíkurbæ vegna þeirrar náttúruvár sem steðjar að sveitarfélaginu um þessar mundir. Í frumvarpinu er lagt til að lögfest verði heimild fyrir Grindavíkurbæ til að lækka eða fella niður álagðan fasteignaskatt sveitarfélagsins á árinu 2024 og að tiltekin framlög Jöfnunarsjóðs sveitarfélaga til sveitarfélagsins taki ekki breytingum þrátt fyrir þá stöðu sem nú er uppi.

Frumvarpið er samið í samráði við Grindavíkurbæ og telur sveitarfélagið að með því sé komið til móts við óskir bæjarstjórnar um nauðsynlegar heimildir fyrir bæjarstjórn til að bregðast við afleiðingum náttúruhamfara undanfarinna mánaða.


Á þessu stigi liggur ekki fyrir nákvæm útfærsla af hálfu sveitarfélagsins um að hve miklu leyti heimildir skv. a- til c-liðum 1. gr. um lækkun eða niðurfellingu fasteignaskatts verði nýttar en verði frumvarpið lögfest mun bæjarstjórn hafa heimildir til að bregðast við í samræmi við frekari atburðarás.

Vert er að taka fram að áður en náttúruhamfarirnar hófust var Grindavíkurbær fjárhagslega vel státt sveitarfélag, með jákvætt eigið fé og nánast engar skuldir. Sveitarfélagið óskaði eftir fresti til að skila fjárhagsáætlun fyrir árið 2024 vegna mikillar óvissu um forsendur í tekjum og rekstri sveitarfélagsins á þessu ári. Fjárhagsáætlun var samþykkt við seinni umræðu 9. janúar sl. með 371 milljón kr. halla.

Eftir eldgosíð 14. janúar sl. er því miður ljóst að veruleg óvissa ríkir um tekjuhlíð fjárhagsáætlunar. Grindavíkurbær hefur því leitað til innviðaráðuneytisins eins og sveitarstjórn ber að gera skv. 2. mgr. 77. gr. sveitarstjórnarlaga þegar fjármál sveitarfélags stefna í óefni. Það frumvarp sem hér er til umsagnar er afrakstur þess samtals. Með því eru sveitarfélaginu tryggð óbreytt framlög úr Jöfnunarsjóði sveitarfélaga á yfirstandandi ári, sem er sveitarfélaginu afar mikilvægt.

Rekstrarhæfi Grindavíkurbæjar er engu að síður ógnað vegna minnkandi tekna og mikillar óvissu um framtíðarþróun, svo sem varðandi íbúafjölda og útsvarstekjur, rekstur Grindavíkurhafnar o.m.fl. Fyrirséð er því að ef sveitarfélagið á að geta starfað áfram mun þurfa að koma til stuðningur úr ríkissjóði á þessu ári og að öllum líkindum einnig á næstu árum.

f.h. Grindavíkurbæjar



Jón Þórisson, sviðsstjóri fjármála- og stjórnsýslusviðs

jont@grindavik.is



Grindavíkurbær
Sviðsstjóri fjármála-
og stjórnsýslusviðs